

## Sabse Behatreen Aur Paak Ibaadat

### Injeel : Yaaqub 1:1-27

Janaab Yaaqub ne, jo Allaah rabbul azeem aur Īsā<sup>(a.s)</sup> ke k̄hidmatgaar the, purī duniyā me phaile hue Allaah ke bandoñ ko salaam kahā. <sup>(1)</sup> Aur kahā:

Mere bhaaeeyoñ aur bahanoñ, tum mushkil me bhī k̄hush rahā karo. <sup>(2)</sup> Kyuñki tum ye jaante ho mushkileñ tumhaare ĩmaan kā imtihaan letī haiñ, aur tumheñ mazbut banne me madad kartī haiñ. <sup>(3)</sup> Apnī lagaataar mehanat se acchā ko haasil karo. Ye tumko purī tarah se behatreen banā degī aur tumhaarī har zarurat ko purā karegī. <sup>(4)</sup> Lekin agar tumheñ aqlmañdī kī zarurat hai to wo tum allah taa'alā se maango. Jo bhī us rab se aqlmañdī maangtā hai use wo dariyaadilī se atā kartā hai. Wo kisī bhī maangne waale ko kabhī maayus naheen kartā. <sup>(5)</sup> Lekin tum Allaah taa'alā par ĩmaan rakh kar maango; aur tumhaare dil me koī shak naheen honā chaahie. Jo shak kartā hai to wo samañdar me ek lahar kī tarah hai, jisko hawā dhakkā de kar uchāal detī hai. <sup>(6)</sup> Is tarah ke ĩnsaan ko ye soch lenā chaahie ki use Allaah rabbul kareem se kuch haasil naheen hogā. <sup>(7)</sup> Jo shak kartā hai wo kabhī koī faisla naheen kar paatā aur laḍakhaḍaatā rahtā hai. <sup>(8)</sup>

Ek ĩmaan waale ḡareeb ĩnsaan ko apne unche maqaam par fakr karnā chaahie. <sup>(9)</sup> Aur ek ameer ĩnsaan ko Allaah taa'alā kā shukr adā karnā chaahie ki jab Allaah taa'alā usko jhukā de aur uske dil me ehasaas paidā kare ki ek din wo bhī ghaas me uge ek phul kī tarah hī k̄hatm ho jaaegā. <sup>(10)</sup> Suraj ke ugne se garam hawā chaltī hai aur ghaas sukh jaatī hai. Ghaas me uge k̄hubsurat phul tuṭ kar gir jaate haiñ aur barbaad ho jaate haiñ. Isī tarah se ek ameer ādmī apne roz ke kaam karte-karte is duniyā se chalā jaaegā. <sup>(11)</sup>

Wo kitnā k̄hush naseeb hai jo museebat me bhī himmat se kaam letā hai. Jab wo ĩnsaan apnā ĩmaan saabit kar detā hai to allah taa'alā usko kabhī nā k̄hatm hone waalī ziñdagī atā kartā hai. Allaah taa'alā ne har us ĩnsaan ko ziñdagī dene kā waadā kiyā hai jo usse mohabbat kartā hai. <sup>(12)</sup>

Jab koī ĩnsaan bahak jaae to wo kabhī nā kahe, "Parwardigaar mujhe bahkā rahā hai." Naheen! Allaah rabbul kareem kabhī kisī ko naheen bahakaatā aur nā hī Shaitaan usko bahkā saktā hai. <sup>(13)</sup> ĩnsaan us waqt bahaktā hai jab wo apnī k̄hwaahishoñ ko purā karne ke liye ḡalat raaste par chalne lagtā hai. <sup>(14)</sup> Jab ĩnsaan ke dimaḡ me burī k̄hwaahish apnā ghar banā letī hai to phir wo gunaah ko paidā kartī hai aur jab wo gunaah baḍhtā hai to phir wo use maut kī taraf le jaatā hai. <sup>(15)</sup>

Mere azeez bhaaiyoñ aur bahanoñ, tum ḡalat raaste par mat chalo. <sup>(16)</sup> Har acchā aur behatreen tohfā us parwardigaar kī taraf se hī atā hai jo roshnī ko banaane waalā hai. Allaah taa'alā nā hī badaltā hai aur nā hī parchāaī kī tarah chaaroñ taraf ghumtā hai. <sup>(17)</sup> Allaah rabbul azeem ne hameñ sacche kalaam ke zariye ziñdagī atā karī hai. Ham log uskī maḗhluq kī ziñdā misaal haiñ. <sup>(18)</sup>

Suno, mere bhaaeeyoñ aur bahanoñ! Hameshā jaldī suno aur āraam se bolo. Bahut jaldī se naaraaz nā ho. <sup>(19)</sup> ĩnsaan kā ḡussā usko ĩnsaaf karne se roktā hai. <sup>(20)</sup> To har tarah ke gunaah aur burāaī se k̄hud ko dur kar lo. Faḗhr nā karo balki Allaah taa'alā ke kalaam ko apne diloñ me basā lo kyuñki is kalaam me tumhaarī ruh ko bachaane kī taaqat hai. <sup>(21)</sup>

Saabit karo ki tum wo ĩnsaan ho jo Allaah taa'alā ke kalaam par amal kartā hai; un logoñ kī tarah nā bano jo sunte haiñ, lekin amal naheen karte. Wo apne āpko dhokā de rahe haiñ. <sup>(22)</sup> Allaah taa'alā ke kalaam ko sun kar us par amal nā karne waalā ĩnsaan aisā hai ki jaise usne apne chehre ko āeene me dekhā. <sup>(23)</sup> Wo apnā chehrā āeene me dekhtā hai, phir apnī nazar haṭte hī bhul jaatā hai ki wo kaisā dikhtā thā. <sup>(24)</sup> Lekin sach me wahī ĩnsaan k̄hush hai jo Allaah taa'alā ke kalaam ko bahut dhyaan se paḍhtā hai. Sirf un logoñ ko āzaadī miltī hai jo Allaah taa'alā ke kalaam par amal karte haiñ aur usī ke mutaabiḡ zindagī guzaarte haiñ. Jo ĩnsaan kalaam ko sun kar use kabhī naheen bhultā, aur us par amal kartā hai, to usmeñ use barkat haasil hotī hai. <sup>(25)</sup>

Ek ĩnsaan k̄hud ko deendaar samajhtā hai, lekin agar wo apnī zabaan par qaabu naheen rakh saktā to wo apne āpko dhokā de rahā hai. Uske mazhab kā koī faaydā naheen. <sup>(26)</sup> Sabse behatreen aur paak mazhab, jisko hamaarā parwardigaar pasañd kartā hai, wo ye hai: Pareshaan haal yateem bacchoñ aur bewaaoñ kī dekhbhaal karnā; aur apne āpko duniyā kī chamak se bachaanā. <sup>(27)</sup>